



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 3

Yangia anidakangma :



Tir Yimym



tir_yimym



tir yimym

TAPAK 8

Rahul Gandhi-i Bihar nung 'Vote Adhikar Yatra' tenzükogo

Alvaro Morata Serie A club Como nung denogo



VOL. XXII ISSUE NO. 303 (ADOK 303)

DIMAPUR

AMUNGNÜ (SUNDAY)

LUROI (AUGUST) 17, 2025

₹ 5.00

Kohima nung Congress züngsem tasen 224 züngokogo

Kohima, Luroi/August 16 (TYO): Nagaland nung Congress Party ulushia Kohima district kübok constituency trok nungi lanurtem timba sür nisung 224 tashi Kohima District Congress Committee (KDCC) nung Honibarnü züngsem kumogo.

KDCC ajanga ashiba agi, züngsem tasentem ya 8-Western Angami A/C nungi 14, 9-Kohima Town A/C nungi 85, 10-Northern Angami-I A/C nungi 37, 11-Northern Angami-II A/C nungi ana, 14-Southern Angami-I A/C nungi asem aser 15-Southern Angami-II A/C nungi 65 alitsü.

Züngsem tasentem pela agizükba mapang, state nung temelenshi bener arutsü temulungtetba nung Congress lir, ta Nagaland Pradesh Congress Committee (NPCC) tir aser Lok Sabha MP, S. Supongmeren Jamir-i ashi.

"Asen state melenshitsü asoshi inyaktsü tejangraba aser temulungtetba lir. Iba yongji lanurtem aser taintemi Congress nung adentsü telemetba agi," ta pai ashi aser Nagaland tajungba kuma yangertsü asoshi senso ajak

vote kasa jenjang lir ta angatetdaksü.

Züngsem tasen asoshi pelaba pai lemsatep aser ibai Nagaland nung tesüiba mapang Congress wangshia aliba lepa bener arutsü asoshi party tashi itshiba aser asendenshiba nung mera ka lir, ta ashi.

Constituency balala nungi züngsem tasen aruba ajanga yimsüsüba, shisaliok, health care, employment aser lenla ajak nung terenlok asoshi party mangdang nung tamang akaba sayur, ta Jamir-i ashi.

Iba sentong nung KDCC tir Ketseiyie Mere-i züngsem tasentem pelashishia agizüka liasü.

NPCC working president (Administration Zone-II) Khriedi Theunuo-ia telok ayongzük aser NPCC secretary Kevi Vizo ajanga züngsem tasen party nung adener tenüng zünga liasü.

Sentong nung KDCC Working president Khuvishe (Atomu) menden liasü, NPCC secretary Seyievilie Sachü ajanga sarasadema tenzük aser züngsem tasen Sedevinuo Yhome-i temeja ken ka aten.

Nagaland RMSA 2016 Batch tesayur temi scale pay meshir

Kohima, Luroi/August 16 (TYO): Nagaland RMSA 2016 Batch Teachers Association (NRMSATA-2016) ajanga State sorkar nem tatembang takhangba ka agüja, scale pay nung Supreme Court obendang nung anidaktsü, itasen aser arrears magütsü aliba ajak agütsütsü aser 2016 nungi tenzüka parnok indang service benefits tem agütsütsü ashi.

Honibarnü Kohima nung osangbener senden ka nung jembidang, parnoki akhangba ama August 25 tashinung meinyakra pen-down strike agi tenzüka longkak aittsü, ta parnoki ashi.

Tejangja obendang agüja liaka sorkar ajem-ajema aliba ya kanga mepelar ta ashi.

2016 batch RMSA tesayur nem Scale pay sen 9,300-34,800 den grade pay sen 4,200 aser annual increments agütsütsü Gauhati High Court Kohima Bench ajanga March 16, 2022 nü totuyuba agüja aliba kasaji Supreme Court-ia May 20, 2025 nü obendang agütsü, ta NRMSATA-2016 lenirtemi ashi.

Written aser viva examinations ajanga graduate teachers 610 shim aser item posts ya Finance Department, P&AR aser Cabinet ajanga 2015 küm yanglua liasü ta ashi.

Item temelaba liaka appointment orders ya February 2016 nung agütsü aser fixed pay sen 31,015 nung yutsü aser iba

ama tim masüba inyakba kuli agütsü official record kecha mali ta ashi.

Ibai bendanga amshiba maparen ka lir, kechiaser RMSA batches (2010-2013) nem regular scale pay agütsür.

Contractual mesüra ad-hoc service nung shimer regular akumba ya service benefits ajunga atema public employment ama züngshitsüla, ta tesayurtemi ashi.

Parnoki June 21, 2018 nü Cabinet Memorandum ka bilemteta ashi, kong Ministry of Education ajanga tesayurtem fixed mesüra contract nung masü saka regular basis nung shimtsü shia lir.

Association-isa parnoki temulung agüja tanen makai mapa inyakaka April 2025 nungi itasen mangur ta ashi.

August 13 nü parnoki State Mission Director, Samagra Shiksha nem tatembang takhangba ka agütsüba nung SSA-RMSA 2010-13 tesayur den sako ROP 2017 scale pay agütsütsü, 2016 nung appointment agütsüba anogo nungi itasen aser service benefits azüngtsü aser arrears magütsü aliba ajunga agütsütsü shia lir.

Latetja aliba mapang nung sorkari telangzüba tajung magütsüra, onoki August 26 nü nungi tenzüka yimya balala nung longkak ait tenzüksü, ta NRMSATA-2016 ajanga ashi.

Raj Bhavan nung Asür Ganesan bilemtetba sentong agi



Raj Bhavan nung Asür Ganesan bilemtetba sentong agiba noksa nung angur.

Dimapur, Luroi/August 16 (TYO): Nagaland Angh, Asür La. Ganesan nem akhum agüja sentong ka Raj Bhavan, Kohima nung August 16, 2025 nü agia liasü.

Nagaland Legislative Assembly indang Speaker, Sharingain Longkumer-i iba sentong nung jembidang, iba sentong ya Angh nem akhum agüja aser temeim temaitsü fellowship ka ama alir, ta ashi.

Asükhu aser tejashi lemsatepba mapang, Angh asüba ajanga tazüing

tuluka yutsüogo, ta ashi.

Nagaland nung aliba nüburtem tenüng nung Chief Minister, Deputy Chief Ministers aser Chief Secretary oa Chennai nung Angh asüpila sentong nung adener aser Kohima nung züngsemtem Raj Bhavan nung adenshia iba sentong agir, ta Longkumer-i metetdaksü.

Naga nunger yimsü nung asür indang ki kodanga tazüing metoktsür aser iba yimsü amshia Angh'er kibong den asükhu lemsatepa iba sentong ya agir, ta

NLA Speaker-i ashi.

Iba sentong nung Nagaland Legislative Assembly züngsemtem adenba asoshi pelaba lemsatep aser ibai State nung constitutional head nem akhum agütsüba temaitsü lir ta ashi.

Iba sentong nung Nagaland Legislative Assembly züngsemtem dena asür nem akhum agütsü aser narolang yuja liasü.

Iba sentong Rev Izieteilung Tering, State Chaplain menden sür agia liasü.

Nisung tepsetba tai tonglokja alir nem bail agütsüba aitsür: NMA

Kohima, Luroi/August 16 (TYO): Zeliangrong Mepui Organisation den onok nokdaka lir aser Pimla nung tanur tetsü ka tepsetba ken o nung tai tonglokja alir ajunga nem bail agütsüba khukhua aitsür, ta Naga Mothers' Association (NMA) sangdong ka ajanga ashi.

NMA ajanga state sorkar dang iba ken o nung tetsüng ajemoka ochi obendang

agütsütsü ayongzüka liasü.

Iba ken o police temi tekeraba nung bushisüingdangsü aser ozüing nung aliba ama temerenshi agütsüdaktsütsü asoshi NMA-i taoba mapang Commissioner of Police, Dimapur ajurua lir.

Onoki tasenba Commissioner of Police, Dimapur dang taoba Commissioner of Police-i court nem petition petition agüja aliba

angateta ken o tembanga ochi obendang magütsü tashi tai tonglokja alirtem police ket nung yua alitsü ayongzüker, ta NMA ajanga ashi.

Aseni teti meima aliba adianutsür aser tetsü ka Pimla nung tepsetba asoshi ochi obendang agütsüdaktsütsü atema Naga nunger tetsür ajak nokdaktsü ayongzüker, ta NMA sangdong ajangasa ashi.

State Quota ya Naga nunger lisopur temeja asoshi lir: NSF

Dimapur, Luroi/August 16 (TYO): Naga Students' Federation (NSF) ya Naga nunger kaketshir tentet tulutiba ama Nagaland lisopur meyong temeden aser maongka wazüka ayutsü ya ozü teinyaktsü lir. Anungji NEET 2025 admissions atema Nagaland State Quota kübok candidate Vatsala Panghal dak sendakba tebilemtsü tulu nüdangi bener arur, ta NSF ajanga Chief Secretary, Government of Nagaland dangi tezüluba ka agütsü.

Vatsala Panghal yagi NEET 2025 Score 455, All India Rank 113803 aser State Rank Category III nung S.No. 1 ngutet Tebu ya Colonel Lovelesh Panghal, Commanding Officer, 1 Nagaland NB, NCC, Kruoliezou Colony, Billy Graham Road, Kohima aser Haryana state nungi lir.

Tebu tang posting yangi aliba mechi candidate-i Kohima nung address agütsü, ajisüaka la teti aliba tesembo Haryana ta kuli tejangja lir. La ya Nagaland lisopur ka masü aser State indang

Scheduled Tribe kata nungia masü. Professional courses atema State Quota ya Naga nunger azü aser Nagaland nung lisopur candidate kisüing atema wazüka yuja lir, koba tang aliba policy tem nung shia lira ser State nung Scheduled Tribes wazüka ayutsü constitution nung mela aliba ama lir, ta NSF ajanga ashi.

Lisopur masür temi khen asoshi arua mapa inyakba, tiazü kuli yanglua mesüra eligibility meshidak amshia item ama kangadang tatakzük aser kanga sashia toktepa menden agütsü merangba NSF-i anema nokdaka aser nokdanga arur, ta ashi.

Iba ama metemsüba candidate nem State meyong menden agütsüba ajanga lendong aketba tatishitsü tamajung yutsütsü, temsüa aliba Naga nunger lisopur kaketshirtem pei temeden maongka magütsütsü aser State Quota policy tanüla samatsütsü, ta NSF ajanga ashi.

NSF ajangasa taküm August ita Kohima nung ozü Office nung State Quota candidates ajunga

indang documents jangjatepba maparen ozü Education Committee ajanga ketdangsüa inyakogo. Iba mapang Scheduled Tribe Certificates aser Indigenous Inhabitant Certificates tem kanga junga reprangshimogo. Temulung melemtettsüsa temsüa aliba kuli kaketsü tem magütsütetba candidate kar danga lira, itemji metemsü ta tekeraba nung sangdongtsüla, ta ashi.

Anungji Nagaland State Quota kübok NEET 2025 asoshi Vatsala Panghal indang candidate ya disqualify sütsütsüla, aser tarutsü nung lisopur masüba candidate temi iba ama inyaktsü merangba nungi nokdangtsü asoshi tim ketdangsür dang verification processes akangshitsü totuyuba agütsütsüla, ta NSF-i ashi.

Naga nunger lisopur shisaliok temeden wazüka ayutsü tangatetba nung iba ken o nung nai tekeratiba nung temulung agütsütsü tamang akar, ta NSF ajanga Chief Secretary dangi züluba shiti nung shia lir.

DDCF-i Mother Teresa Charity Home semdang



Dimapur, Luroi/August 16 (TYO): Dimapur District Citizens' Forum-i August 15 nü District Administration-i nongloksüba ama 79buba India Independence Day nüngdem nung Mother Teresa Charity Home, River Belt Colony, Nuton Basti

Dimapur semdangogo. Bengali Samaj, Sikh Samaj, Muslim Council Dimapur, Rongmei Naga Indigenous Forum, Kachari Tribal Council Nagaland aser Kuki Union Dimapur nungi züngsemtemi DDCF tenüng nung iba Home semdanga

liasü. DDCF züngsemtemi Home achaayangertem den ajuruteper aser iba Home nung alirtem den senaksema liasü. Lenirtemi tajungshi o balala lemsataper aser parnokisa aonsotsü kar tenla agüja liasü.

NDPP Youth lenir kati IMFL shibelenba NTPRADO-i aitsü

Dimapur, Luroi/August 16 (TYO): Nagaland Transparency, Public Rights Advocacy & Direct Action Organization-i sangdong ka ajanga, Lok Jan Shakti (LJP) Party MLA, Sukhato A Sema'erjabaso Nationalist Democratic Progressive Party (NDPP) youth lenir Enoch S Wotsa-i ozüng alema inyaksangshiba atema aitsüogo.

Enoch S Wotsa aser pa

sülen anidakertem August 13 nü Indian Made Foreign Liquor (IMFL) shibelenba atema Khatkhathi (Assam) nung pua liasü.

NTPRADO-i, Central Youth Organization, NDPP aser NPCC (Congress) Party nati iba anema nokdakba atema tenüingsang agütsüogo. Enoch S Wotsa ya sorkari nominate asüba Dimapur Municipal Council (DMC) Councillor ka lir.

NTPRADO-isa, Enoch S Wotsa ya DMC Councillor mapa nugngi magin tashi parnoki repranga dangbo metoktsütsü ta ashiba den, Law Enforcing Agency tem dang aibelenalirtem ajak temzüng ozüng dak ajemdaker merenshia ajak dang tatishitsü tajung ka sayutsü aser Nagaland nung temzüng ozüng aser ochi obendangji ajak atema kasadang ta metetdaksütsü mepeshia liasü.

CM-i anir kija aser lokti tentet balalai asükhu lemsataper

Dimapur, Luroi/August 16 (TYO): Nagaland Chief Minister Dr. Neiphiu Rio-i sangdong ka ajanga Angh La. Ganesan August 15 nü Chennai nung asüba osang angazüka asükhu lemsataperogo.

La. Ganesan ya Nagaland Angh asütsü atema 2023 küm February 11 nü shim aser pai bendanga agüja state tenzüko. Pai Nagaland nung telongjem aser terenlok atema anibelem mesasai inyakogo. State nung mapa temaba bener liaka pa kanga dang tongmelang, ajemalu aser tekübokba jenjang tashi den kanga junga sendaktepa liasü.

Ni pa den inyakba mapang ni pa ya ochishir, principle, shisatsü akaba nisung ka aser Constitution shitak benoka

inyaktsü bendanga agütsür aliba nisung ka liasü ta meteta aküm, ta CM-i ashi.

Nagaland sorkar aser ozü kibong tenüng nung ni asür kinungertem den asükhu lemsataper. Mangyim jashi nung aliba mapang onok sarasadem parnok den lir. Tulusang Tsüngremi parnok nem mangyim jashi koktettsü atema tashi aser anisüngzüak agüjang ta aser pa tanüla teti tatem makadak anisüngzükdakjang ta sarasademtsür, ta CM-isa kasa sangdong ajanga metetdaksü.

Kasa mapang nung Ao Senden-ia, Nagaland Angh asür La Ganesan asüba osang angazüka aoksaba lemsataperogo, shiba taoba mapang Manipur aser West Bengal Angh liasü. Pa ya Parliamentarian,

Administrator ka liasü aser iba den shisataka, ochishir aser ajemaluba nisung ka liasü.

Tulusang tsüngremi asür kinungertem nem yimjung aser anisüngzüak agüjang aser asür asür tanüla teti tatem makdak anisüngzükdakjang ta sarasademtsü, ta Ao Senden tir Marsanen Imsong aser Gen. Secy Imtipokyim nati külem sangdong ka ajanga metetdaksü.

Maneni Naga People's Front tir Apong Pongoner, CANSSEA, Advisor to the Chief Minister Government of Nagaland Abu Meth, Naga Mothers' Association aser Nagaland BJP State tir, Benjamin Yephthomi nungeria asür kibong den asükhu lemsataperogo.

Independence Day nü tetushi balala agütsüogo

Dimapur, Luroi/August 16 (TYO): State ajunga nung Independence Day amungba anogo Nagaland Civil Secretariat Plaza, Kohima nung award balala agütsüba sentong agiogo.

Sentong nung Deputy Superintendent of Police Nagaland, Bendangwati Ao nem pa mapa tajung asoshi President Police Medal agütsü.

Police Medal angurtem rongnung Commissioner of Police, Kevithuto Sophie aser Commandant Nagaland, Aboli Metha na densema liasü.

Governor's award for Gold Medal ya Niak 2nd NAP Battalion, Takonungba, Athletic coach Khriezotuoouo Theunuo aser Hito Kito 'The Nagaland Madrigal Singers' nunger nem agüja liasü.

Pungro nung Sub-Divisional Police Officer Office lapokogo

Dimapur, Luroi/August 16 (TYO): Kiphire district nung temzüng ozüng tajungba benoka inyaktsü aser nüburtem tajungba tenzüksü atema Nagaland Deputy Chief Minister aser Minister for Home & Border Affairs, Yanthungo Patton-i Honibarnü Pungro nung Sub-Divisional Police Officer (Ex-Officio) office semzüksüogo. Iba office semzüksüba sentong ya SDPO Office nung agia liasü.

Iba office tasenba yagi policing infrastructure tashi taitba kümdaktsütsü, law enforcement agency tem yongtsü nung tesendakteper tajungba kümdaktsütsü aser nüburtem takaraba aser tajungba tenzüksü imlar.

Iba sentong nung MLA & Advisor, Home Guard & Civil Defence, Fire & Emergency Services, Relief & Rehabilitation, Govt. of Nagaland, S. Kiusumew Yimchunger tetushi tejaoker liasü.

Sentong ya Guard of Honour ka agütsüba sülen alakteta jaokeri nüngshilong sayaja tenzü. Sentong nungsa ketdangsürtemi o tatsütsü jembia aser sobaliba sentong balala agia liasü.

Sentong nung shilem agiba tongtibang ketdangsürtem rongnung Videlaile Zashumo,

IPS, Inspector General of Police (ADM); Temsuwati Longkumer, Deputy Commissioner, Kiphire; Chinese Chakhesang, NPS, Superintendent of Police, Kiphire; Disani Newmai, Addl. SP, Kiphire; Makezho, Executive Chairman, Yimkhiung Tribal Council (YTC); Nelizho Tep, ADC Pungro; Khrusuothu Nyuthe, Commandant, 14th IRB aser taoba mapang Minister V. Kashiho Sangtam nunger densema liasü.

Sentong nung o jembiba mapang Patton-i, iba mapa takok asoshi stakeholder balalai longjemmer inyakba atema tenüingsang agütsü aser ashiba agi, iba office yagi temzüng ozüng aser security dak sendakba nung district nung aliba nüburtem kanga ajangzükdaktsütsü.

Iba sentong den külemi Deputy Chief Minister-i Pungro nung lokti senden ka nung shilem agia liasü, kong pai local stakeholder tem den sensak asem aser parnok tebilemtsü aser tebilemdangba tem angadanga liasü.

Sentong ya Yimkhiung Liperü Arih Ako-i sobaliba ken ka tener tembang aser tesentepertem ajak chiyonger senshia liasü.

Biofertilizer Production Units 10 semzüksüogo

Dimapur, Luroi/August 16 (TYO): Nagaland Civil Secretariat Plaza, Kohima nung August 15 nü linük Independence Day amungba mapang Nagaland Chief Minister Dr. Neiphiu Rio-i Zubza, Dimapur, Jalukie, Wokha, Zuketsa, Mokokchung, Longleng aser Tizit nung Biofertilizer Production Units 8 aser Advisor, Information & Public Relation and Soil and Water Conservation, Imkong L. Imchen-i Tuensang aser Noklak nung Biofertilizer Production Units ana virtually semzüksüba liasü.

Department of Soil & Water Conservation-i, Ministry of Agriculture and Farmers Welfare, Government of India kübok PM-RKVY indang Soil Health and Fertility Scheme kübok state nung tesem balala nung Biofertilizer Production Units 10 amenokogo.

Item production unit tem ajanga state nung aluyimertem nem indigenous, cost-effective, eco-friendly biofertilizers aser biopesticides agüja sustainable agriculture ajungkettsü nükjidong lir.

2022 küm July ita 12 nü Department-i, CAU


Bioenhancer, CAUJhum Bioenhancer, aser Um-Met Biopesticide ta product asem atema technology belenteptsü asoshi Central Agricultural University, Umiam, Meghalaya den tenangzüktepba ka nung sign süa liasü.

Unit shia nung litre 5,000 adodaktsütsü tashi lir aser output tem ya aluyimertem, demonstration farm tem aser sorkari nongita yariba aluyimba inyakyimtem nem lemtsütsü.

Kasa anogo Nagaland Chief Minister Dr. Neiphiu Rio-i ULB 20 atema Waste Collection & Transportation Vehicles commission sütsüogo.

Swachh Bharat Kosh ya 2014 küm India merek mereka ayutsü atema amenoka liasü. Ministry of MoHUA-i Swachh Bharat Kosh atema state nung ULB 39 nungi 20 atema senotsü teyari agüja liasü.

ULB 20 nem sanitation collection aser transportation vehicle 41 agütsütsü. Item garitem nung GPS aser PA system tem keta lir. Temsüa aliba ULB tem nem Uniform, tsüngsem, raincoat, asükwa asemtsüba jacket, bin aser jana bendentsü atema hadirtem agütsütsü.



Manipur Angh Kumar Bhalla-i Honibarnü Imphal kübok Sri Sri Radha Krishnachandra Manimandir (ISKCON Temple) nung "Krishna Tattva - Character Building" dak sendakba nung seminar ka nung shilem agiogo. Noksa nung pai souvenir sayatsüba angur.



August 16, 2025 nü Ranchi nung Jharkhand Governor, Santosh Gangwar-i state Education Minister asür Ramdas Soren nem akhüm agütsü dang tangokba noksa nung angur

India-i Trump aser Putin na senden amenba pelaa agizüker: MEA

New Delhi, Luroi/August 16 (Agencies): US Tir Donald Trump aser Russia Tir, Vladimir Putin na Alaska nung senden amenba atema India-i lenir ana nem tenüsang agütsüba den külemi tenati yimjung atema meranga inyakba atema pelaa lemsatep.

Honibarnü Ministry of External Affairs (MEA)-i sangdong ka ajanga, Alaska summit nung telemtetba agibatemi India-i pelaa agizüker; ken o jembiba aser yimtenren ajanga inyakba ajanga dang tejakleni aotsü, ta metetdaksü.

MEA-isa, alimai tekaraba nung Ukraine nung rara anendaksüner, ta metetdaksü.

"Alaska nung US Tir Donald Trump aser Russia Tir Vladimir Putin na Alaska nung senden amenbaji India-i pelaa agizüker. Lenir anati yimjung atema inyakbaji tenüsang agütsüba tetemsü. Iba senden nung telemtetbatem agibaji India-i pelaa agizüker. Ken o jembiba aser yimtenren ajanga inyakba ajanga dang tejakleni aotsü. Alimai tekeraba nung Ukraine nung rara anendaksüner," ta MEA-i metetdaksü.

Hokolbarnü US Tir Trump-i, Russia Tir Vladimir Putin tena senden kanga junga kaogo; Russia-Ukraine rara nung meimchir asü-amaba ajema akümtsü nükjidong nung rangloker senden amen, ta

metetdaksa liasü.

Trump-i, "Telok anapronglai inyakra hopta shia nisung meyirjang aika kümzüksü. Onoki hopta shia nisung 5,000, 6,000, 7,000 tepsetba nokdangtetsü, aser Tir Putin-ia ni bilemba amaji aginer," ta metetdaksü.

Trump-isa, onük aika nung melungtepogo aser tongtibang onük kar atemabo telemtetba magitet, ta metetdaksü.

"Tezüngzüktep magi tashibo tezüngzüktep mali. Atangji ni Tir [Volodymyr] Zelenskyy dangi call süa tanü senden amenba indang metetdaksü. Tatem nunbo ibaji parnok melung," ta United States Tir Trump-isa metetdaksü.

Rahul Gandhi-i Bihar nung 'Vote Adhikar Yatra' tenzüko

New Delhi, Luroi/August 16 (Agencies): Honibarnü Congress lenir aser Lok Sabha nung opposition lenir, Rahul Gandhi-i Bihar nung "Vote Adhikar Yatra" tenzüko.

Bihar nung electoral roll atema Election Commission-i benokba special intensive revision (SIR) ya vote auyatsü atema lir, ta pai tai tongloksür.

Yatra ya Amongnü tenzüksü aser anogo 16 tsünga Bihar nung district 20 dak tali ayimjemtsü, ta party-i metetdaksü.

Rahul-i X ajanga, "Onoki nüburttem asoshi Voter Rights Yatra bener arutsür. Iba rara ya democratic temeden - 'nisung ka, vote ka' atema lir," ta metetdaksü.

Paisha, "Linük temzüng kümzüksü atema Bihar nung onok den külemi shilem agiang," ta metetdaksü.

Bihar nung opposition teloktep Mahagathbandhan-ia Congress pusema iba yatra nung shilem agitsü. Iba yatra ya Sasaram nungi tenzüksü.

RJD lenir, Tejashwi Yadav-i, "Asüng onoki Sasaram nungi Vote Adhikar Yatra tenzüksü. Asüng onoki Mahagathbandhan teloktep den shilem agitsü. Onoki district aika sema senzütsü aser voters ka danga mezügdoktsü atema nüburttem nem rajemdaksütsü," ta metetdaksü.

Tejashwi Yadav-isa iba yatra indang omen ken ka social media nung lemsatepba den külemi

nüburttem dang iba yatra nung shilem agitsü ayongzü.

Bihar nung assembly election agitsü ita ishika dang lia Election Commission-i electoral rolls reprangshitsü atema benokba SIR anema opposition-i longkak aiter.

Opposition party temi, SIR ya Bihar nung democracy atema amokmeren lir, ta metetdaksü.

August 7 nü Rahul Gandhi-i Karnataka nung Bengaluru Central parliamentary constituency

Kübok Mahadevapura assembly nung vote ochimashi metetdaksa liasü.

Paisha, Election Commission-i BJP den senteper inyaker, ta tai tonglokja liasü.

UROLOGY CAMP alitsü

Visiting Consultant ji:

Dr. J Gnanaraj

(Urologist & General Surgeon)

Anogo : August 22-23, 2025

Contact : 6909534343 / 6909533287

Metetpelañura agüja aliba number ajanga August 21 anogo tashi nung mesüra iba anogo matongdangsa tongtepratepang.

(Poktsütem dak sendakba timtem balala, tezüngjang nung lung aser natzü dak sendakba timtem alirtem asoshi)

Tanü EC-i osangbenertem senden ayongzüker

New Delhi, August 16

(Agencies): Opposition party temi Bihar nung SIR anema longkak aitba aser Congress lenir Rahul Gandhi-i Election Commission aija aruba mapang ka nung Honibarnü Election Commission of India (ECI)-i, parnoki Honibarnü New Delhi nung aliba National Media Centre nung osangbenertem senden ka ayongzüka akatsü, ta metetdaksü.

Iba senden nungji Election Commission-i Bihar voter list mangatettep, Supreme Court tetuyubatem aser linük tatong Tir election atema terenemshiba osang metetdaksütsü akok.

Taküm June 24 nü Election Commission-i Bihar nung SIR exercise tenzüka liasü.

Election Commission-i, nüburttem aika yimtitemi oa litepba, tang mezüng voters lanurtem aser aikati tesem melenshia aliba nung ajemdaker electoral rolls reprangshitsü atema SIR exercise ya agitsüsa aküm, ta metetdaksüogo.

August 1 nü Election Commission-i Bihar nung draft voter list sangdongogo. Draft roll nung tashishiba lira itemji metetdaksütsü atema ita ka mapang agütsüogo, iba sülen final voter list sangdongtsü.

Brihostibarnü Supreme Court-i Election Commission dang voters list nungi indokba tenüng lakh 65 ji district sasep nung sangdongang, ta tetuyuba agüja liasü.

Ano külen Justices- Surya Kant aser Joymalya Bagchi nati Election Commission dang voters list nungi agienba voters dang nungi maitsü atema Aadhaar agizükang, ta metetdaksü.

Ano külen, August 4 nü Jagdeep Dhankhar-i ajungbena linük tatong Tir menden nungi anenba ajanga tatong Tir election agitsüsa aküm. Tatong Tir election ji September 9 nü agitsü aser kasa anogo nungjisa osang sangdongtsü.

Tatong Tir election nung vote agütsütsü temsüa alir MP 781 lir, anungji candidate kati takok angutsü atema vote 391 nüngdaker.

Foreign Secretary Vikram Misri-i Nepal semdangtsü

New Delhi, August 16

(Agencies): Taruba ita Nepal Ato kilonser K. P. Sharma Oli-i India semdangtsü lia August 17-18 anogotem nung India Foreign Secretary, Vikram Misri-i Nepal semdangtsü, ta MEA-i metetdaksü.

Honibarnü Ministry of External Affairs (MEA)-i, Nepal Foreign Secretary, Amrit Bahadur Rai-i jaokba nung ajemdaker Misri-i Kathmandu semdangtsü, ta metetdaksü.

"India aser Nepal na tsünga tesendaktep kanga junga lir. Tesüiba küm ishika tsünga iba tesendaktep ano tajungba kümogo aser lenla aika nung linük anati amalitepa inyaker," ta MEA-isa metetdaksü.

India nung asalentong atema Nepal ya kanga tongtibang tesem ka nung lir. Küm noklang aika linük ana tsünga sobaliba aser nüburttem tsünga tesendaktep kanga junga lir. India aser Nepal na tesendaktep ya "Roti-Beti" ama lir, ta MEA-i metetdaksü.

Tip ajaklen ali agi longbanger aliba Nepal-i shishilembatsü aser connectivity atema India dak tuluka metaloker. Bendanglen nungi tzü adena osettsüset balala Nepal-i bener aobaji India litsü ajanga dang bener aoe.

Nepal yimtiba, Kathmandu nung Misri-i talisa Ato kilonser Oli-i New Delhi semdangtsü aliba atema jembitsü. Oli-i September 16 nü India semdangtsü, ajisüaka tang tashi nunbo official sangdong kecha magütsü.

MEA-i, foreign secretary Misri-i Nepal semdangba ya India nung "Neighbourhood First" policy shilem ka lir, iba denji külemi mapang shia linük ana tsünga tongti ketdangsertem semdangteper, ta metetdaksü.

Misri-i Nepal semdangba ajanga linük ana tsünga lenla balala nung amalitepa inyakba asadangtsü atema maongka angutsü aser tesendaktep ano tajungba akümtsü atema lenmang tasen bushitsü, ta MEA-i metetdaksü.



August 16, 2025 nü Prayagraj, Uttar Pradesh nung Social workers-i kibur maliba azü ka nem anti-rabies vaccine tutsü dang tangokba noksa nung angur.



TIR YIMYIM YIMOBILEM (EDITORIAL)

DIMAPUR SUNDAY, AUGUST (LUROI) 17, 2025

Aji ni asü?

Tsüngremi meimchir yanglur külen ibaji ngua temulung süa ashi, ya kanga junger. Tsüngremi meimchir yangluba sülen nisung shia nem sempet balala agütsü. Pai kar nem kententsü, kar nem sayutsüngitsü, kar nem tesayur asütsü, kar nem tobur tajung, kar nem ali rongsen, kar nem chirnur, etc. ta nisung ajak lenmang balala nung moatsü. Pai temoatsü balala agütsübaji item ajak jagi Pa sentsüwangshidaktsütsü asoshi liasü. Aji saka alima meimchirtemi Tsüngremi nükjiongji matalokdaktsüi tatidang nung tsüka lenmang tezüleni prokshia ao. Laishiba nunga kodanga reprangdangdir Yisu ya pa nütsüng kati ashioktsüba indang shia lir. Yisu ashioktsüsang Iscariot Yihuda ya tekolok tajung, shisa taka, senotsü ketdangtsütsü metetba nisung, wainshin akaba tenzüker, shishilemba tashi, temulung lemtetba nisung, lenir asütsü sempet tajung aketba nisung. Item ajakji Tsüngremi pa nem agütsüba sempettem liasü. Pa dak sempet tajung keta alibaji ngua Yisui par telok nung Iscariot nem ya sen juliji amdaktsü. Iscariot ya Kümtetdakba Khrista den mapang talangka lia aruba nisung, Yisui sayuba ajak pai angashia liasü. Yisu sülen tesem balala ajak nung senzüba tenzüker, Yisui sayatenya inyaka nükpoker ngudaktsüba, tsüngtsüker jajadaktsüba, küm aika shiranga alir anebtsüba, temenen tanelai aridokja salatsüba, nisung meyi pungo chiyungdaktsüba, tasür shia arudaktsüba amalatem ajak Iscariot jagi ngua liasü. Kechiaser paji telok senpong amsang asünung pa medeni Yisu nütsüngtem kongia mouka südi. Anungji Yisu sülen mapang ajak nung anidaksangji nütsüngtem rongnung pa ya sür südi. Aji saka kenü anogo Yisui nütsüngtem dang o ka yamai ashi - "shibai kü den ausu ka nung pei teka amüoker, iba nisungjagi ni ashioktsütsü. Nisung chir, pa indang zülua aliba ama aotsü; saka shiba ajanga Nisung Chir ashioktsüdir, iba nisung asoshi ayatai! Iba nisung asoshi pa mesoi ali tajungba süla. Aser pa ashioktsüba Yihudai ashi, "Tesayur, aji ni asü?" Yisu pa dang ashi, nai shiogo." Mathi 26:23-25. Laishibaji asenoki kanga junga züngdangra yamai shia angutsü - Iscariot Yihuda ya pai abenba sen juli jagi atidang. Tanga alima talang nungi aruba langka ka agi pa matidang. Mesüra temenen tanela ka arua pa memesüzük. Yamaji tanüa asen akaba rongsen mesüra Tsüngremi asen nem agütsüba sempet, mesüra anogoshia asenok sotaka aliba wadang aser mapa jagi asenok atidangtsü. Asenok Khristantem aikati kümtetdakba Yisu Khrista indang aikasa meteta lir, saka Yisubo memetet. Yisu indang metetba jagi masü saka Yisu tejangja meteta Paji agizükba ajanga dang asen taküm nung Paji jungkai adoktsü aser medemsortemia asen dak Yisu tobur ajungbaji angutsü. Yisu masü Pa indang kija metetba nisungtem jagi Laishiba tekonga aika meteta alitsü, sentepia meranga aotsü, sayutsüngibaa aika angashir alitsü, arogo nunga tenzüksü, tenlatenja agütsütsü. Parnokji tema tereprangtsü nungbo Yisu tembar tajung ama, saka tesasatsüka Yisubo tejangja memetet aser magizük asünungji taküm nung tatidang balala arudang lisem lima nung asüba ki mesüka takümji septsülen ken, tentsülen ken ta tatidang mopungsem nemji ayipzüa onshishidaktsütsü. Iscariot Yihuda yagia Yisu indang dang masü saka pa mulung taroktiba nung Yisui agizüka Yisui shibar metetadoker ali asübo pai anogoshia bener jajaba sen juli jagi pa atidangdang zübazübaa koktetla. Asen nem Tsüngremi sempet tajung aika agütsüogo. Tangar aika dang nungi balaka asen taküm/kibong temoatsü manung jangratema alir, saka ano item jagi tenük mesüngi lenmang tezüleni awazür asü? Mesüra Tsüngremi asen nem angati agütsüba sempet tajung jagi asenok taküm lenmang tezüleni anir odaktsür asü? ta asenoki asen takümji anogoshia seret odanga alitsüla.

OLEMSABANG

Kokrabangla iba amai melenshi nung koda...?

~ L. Kika Pongener.

1. Asen Aor ajaki mapang talangka nungi kanga aginua aliba, asen Ao oshi nung ita (Month) nungja atoktetba aser hopta tsüngda anogotem (Week Days) nungja Ao oshi agi atoktetba atema kanga pela-a bilemer. Aser joko tangbo Aor lokti sentong balala aser zülu-banglo ajak nung iba nungjaji amshia zülur....aji kanga junger. Ajisuaka, iba ya atokteta amshir ano küm aikabo masü, yongji ano ajakibo temulong nung züngzüngabo meyteter. Anungji ajaki temulong nung züngzünga mayu tashibo, ano küm ishikabo, sentong balala zülu-banglo ajak nung, aser lim arogotem küm shia Calendar atokdang....Anjeti (January), Tsüklai (February) ta....Aser ano hopta tsüngda anogojia...Tentonu (Monday), Sangtennu (Tuesday)...ta English nungja-jia 'Bracket' nung amshi nungdang ajaki tali tejangba metettsü....Anungji ano küm ishikabosa iba amajisa amshia ata-nungang ajaki temulong nung züngzünga yutettsü.
2. Revival aliba mapang sentep nung, sentep metenzük tsüngda ken tena ataba mapang, ken anir karibo telok ajak külemi nokdaktaktsür revival ken aika atener. Iba mapang nungji tantsür-tamburtem aika, tetsüng temekok agi talangka menokdakteti kangasa tim-atemer....Ano mangmangra tashitak keta alir balaka talangka nokdakba jagi mangmanga laodi asür....Aser telok ajak külemi nokdaker tendi ta ayunger karbo menokdakra tobur majung. Anungji ajak külemi nokdakdi ta mesui....Kokrabang temulongerbo ajak nokdaker tendi ta ashiba-ang kanga tajungba asütsü.
3. Tekülem sentep nung sentep medenzük dang mapang kar nung, lokti sarasadem (Mass Prayer) ayongzüker....Iba mapang nungji jokorla, tanaben tsüngtsüng (Bell) demer sentep tenzüksüba mapangbo tonger sernung, arogopur rongnung tejangrar kar sarasadem manenteti talangka sarasademba agi sentep tenzüksü mapang menur. Anungji bendanga agüja jangraa sarasademba jagi tamajung masü tajung, saka mapang metettsü aser amshitsü kanga tongtipang.
4. Ano tekülem sentep nung, sentep anir-i mapang kar nung, sarasadem onuk kar shia lokti sarasademtsü (Mass prayer) ayongzüker....Aser külemi 'Amen' ta ashitsü atema nisung ka nem tenung-teta nungloktsür....Yongji, telok ajak sarasadem temer külemi 'Amen' ta ashitsü ata-a alidang....Tenung-teta nungloktsür karibo ano asentenshir sarasadem onuk ajak-to amshia sarasademmer....Aser idangji mapang talangka agir. Anungji sarasadem onukjibo telok külemi sarasadem dang agiatoker alitsüla. Ajiser, lokti külemi 'Amen' ta ashitsü atema ojang ka-ana agi sarasademji atemtsüla.
5. Tekülem sentep aser lokti-senden balala tembanga/shibanga sarasademtsü (Benediction) shiba nem agütsüdir....Kokrabang kanga talangka sarasadem mesui, akokba tashi tatsütiba nung sarasademtsüla....Kechiyong telok ajak jokorla talangka amenba agi laakteter senshitsü yongya-a atar. Anungji tenungsang agüja ojang ka-ana sarasademmerbo tembangtsüla.
6. Tekülem sentep nung temoatsü meshia sarasadem dang karibo...Onoki iba 'Suki' nung na külemer ta sarasademmer. Tejen putu nung Mosa nung mapang 'Suki' (Tent) nung külema aru....Saka tanu putu nungbo arogo teimba ka nung RCC Building tenlaki nung külemer....Anungji onoki iba 'Tenla-kidang' na külemer....ta ashiba tajungba asütsü.
7. Ano tekülem sentep nung sarasademmer aikati....Ozü sannuker-i ne o jembitsü renema lir.... ta sarasademmer. Asenok ajak ya Tsüngrem'er san, aser item santem anuktsü atema Sannuker (Pastor) ayu....Saka kodang 'Ozü sannuker'...ta shidir....Sannuker-ji 'Ozü' meyong san anuktsü ayuba ama angateter. Anungji Tsüngrem dang par 'San' anuksang indang ashir asünung.... Ne Sannukeri ne o jembitsü renema lir...ta ashiba tajungba asütsü.
8. Tekülem sentep agiba mapang nung, shilem balala agidang aser Tsüngrem o jembiba mapang, talisa, tejaklen amenertem angoteper sensak-aseмба aser menushishiba....Iba ama yimya benshiba jagi shilem agirtem meinprongdaktsür aser karbo 'Nervous' asür. Anungji tekülem nung angoteper sensakasemba aser menushishiba iba amala yimya mebenshitsüla.
9. Pulpit ya Tsüngrem o jembidak aser temeshi sabang....Anungji shilem agir ajaki kanga asüngteta aser akümtsüba amshitsüla. Pulpit ya mulong machiba, mepelaba, inyakyim kar agi mulong masüba, mesura tangutsü tim manguba....Iba ama mulong machi aser nungsen-bangsen sudok-sunema jembidak sabang ka ama mamshitsüla. Kechiyong arogopur aika Tsüngrem o agi temoatsü angutsü yongya-a alidang....Temoatsü angutsü melena temulung yirur aser metsüdaker. Anungjitim amai angatetra iba amai melenshia benshi nung tajungba asütsü sudi....ta kü tebilemba lemsateper.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Mumbai nung Khristan college kati Stan Swamy memorial lecture thinen



August 16, 2025: Tawa Mumbai nung aliba St Xavier's College-i Stan Swamy Memorial Lecture sentong thinentsüsa aküm.

College-i küm shia iba sentong ya ayongzüka agir, ajisüaka RSS den sendaktepa aliba student organization Akhil Bharatiya Vidyarthi Parishad (ABVP)-i iba sentong anema shidi ka züluba sülen college-i iba sentong thinen.

"Migration for Livelihood: Hope amidst Miseries," onük nung iba sentong ya August 9 nü agitsü liasü. Iba sentong nung putir Prem Xalxo-i jembitsü liasü.

ABVP Mumbai Secretary, Prashant Mali-i shidi ka ajanga college principal dang Jesuit putir aser tribal temeden atema inyaksang, asür Stan Swamy bilemtetba sentong ya magitsüla, ta takhangba agütsü.

Mali-i, putir Swamy ya Bhima Koregaon ken o nung tongti aibelener lir aser pa ya Unlawful Activities (Prevention) Act (UAPA) kübok pua liasü, iba dak alia Swamy ya Communist Party of India (Maoist) den-a tesendaktep liasü, anungji pa bilemtetba sentong ya magitsüla, ta metetdaksü.

ABVP züngsemtem aser college administrators tsüngda senden ka amenba sülen college-i iba sentong thinena liasü.

College nung Rector, putir Keith D'Souza-i, "Jesuit tangatetba nungbo, putir Stan Swamy ya India senso ka, aser pa nem tai tonglokja liaka pa tasünü tashi nung pa maitsüi liasü. India nunger ozüng kübok, nisung ka maitsü tashibo pai aibelena mali," ta metetdaksü.

Paisa, "Tang iba lecture thinenogo. College nung Department of Inter-Religious Studies-i ayongzüka lecture ya campus nung küm piyong agiba extra-curricular sentongtem rongnung ka liasü," ta metetdaksü.

Taoba mapang St Xavier's College nung principal, Jesuit putir Frazer Mascarenhas-i ABVP aija, "ABVP-i Jesuit putir Stan Swamy anema tai tongloksübatemji tamendakdak maka, kechiyong Pune Police aser NIA-i pa anema tai tongloksüba dangashi küm 5 dak tali court nung pa anema kuli magütsüteti liasü," ta metetdaksü.

Mascarenhas-isa, iba ken o nung putir Stan maitsütsü aser tiyazü nung tai tonglokja pa jail nung alidang asüba atema temenok meshia Jesuits-i Bombay High Court nung ken o ana benoka lir, ta metetdaksü.

2021 küm October ita nunga Mangaluru nung putir Stan Swamy tenüng nung Park nüngja agütsütsü sentong liasü saka Hindu nungertemi ibaji anema longkak aitba ajanga iba

sentongji thinena liasü.

Khristan putir, Stan Swamy ya jail nung lia 2021 küm July ita nung asü; iba mapang nungji pa arrshi küm 84 liasü.

Swamy ya Indian anti-terror ozüng kübok ita 8 tashi tepuokdak liasü, aser pai bail meshiba temepishiba angadangsü lia pa asü.

Swamy-i tribal nüburtem temeden atema inyaka aru aser 2018 küm pai India nunger kin balala tsüngda rara adokdaksü, ta pa nem tai tonglokja 2020 küm pa pua liasü.

Swamy ya Parkinson tashidak densema tashidak balala agi shiranga liasü saka pa nem bail magütsüi jail nung lia asü.

2021 küm May ita nung pa dak coronavirus tashidak putetba sülen pa hospital nung treatment agi aser pa dak temelungjang tashidaka liasü.

Centre sorkari Unlawful Activities Prevention Act (UAPA) ozüng ya longkak aiterem, osangbenertem, kaketshirtem aser tangartem anema amshia aika puogo, aser iba ya melung masürtem ola madokdaksütsü atema lir, ta aikati ashir.

Pa asüba sülen anogo ka lir India foreign ministry otongdar, Arindam Bagchi-i sangdong ka ajanga Stan Swamy apuba, pua ayuba aser court-i pa nem bail magütsübaji ozüng kübok inyak, ta metetdakja liasü.

ANOGO ABEN TSÜNGREM DEN

KODANGA MARAKZÜBA TAKÜM

"Paji dang kü lung aser kü tekümtet, pa kü mitsa marakzütsü." T. Ken 62:2

Temeimbatem, lungma nung asüba ki kodanga melaotsü ta asenoki laishiba nungi angazüka lir. Süngdong koba tera agi lung nung yangloka meyir iba sungtong meshi-i melaor ta asenoki metet. Saka nisung yabo arakzüa aliba taküm ka asünung asangsang nung nisung shingaia marakzüi melitettsü.

Dawid chubai ni kodanga marakzütsü ta ashibaji pa shi temang indang ashiba masü saka pai Tsüngrem dak azüita aliba kodanga mechioktsü, Tsüngrem den pa tesendaktep kodanga meraksatsü, pai pa taküm Tsüngrem nungi kodanga pila-a moatsü ta ashiba o lir. Dawidi Tsüngrem dak tanang chitetba, tamang katetbaji tesüngmangtsü ka lir. Iba yongji Dawid kodanga tamakoker rongnung maden. Kechiyong pa den Tsüngrem teti liasü.

Temeim adianutem, asen tsürabur otsüla, oboula nungertemi tanü aseni amangba Tsüngremji shibar memetet. Parnoki süng, lungji dang Tsüngrem ama külema aru. Yamaji par putu leptep tsüngtep mapang parnoki süng, lung külema tsükchir nungi par taküm kümzüka ayutsü asoshi arür aruba mitsü mitsa takang yanglua ayu.

Tanü asenoka asen tsüraburtemi inyakba ama tanela nung mitsa takang yanglua yur marakzüi asen tsükchir aruba mita atatsü kanga tenüngdaksü ta angateta yudi ta ayongzüker.

Amnesty International-i Libya nung Khristan 11 chioktsü akhanger

August 16, 2025: Tan hopta Amnesty International-i Libya linük nung tepuokdak aliba Khristan 11 chioktsü takhangba agütsü.

Islam yimsü mezüngmeshiba ken o nung Khristantemji aija liasü.

Libya nunger 10 aser Pakistan nunger ka anema ken o angadangba sülen parnok aitsübaji tim masü, kechiyong inyakyim meshidak liasü aser International human rights standards alema inyakogo, ta Amnesty International-i sangdong ka ajanga metetdaksü.

"2024 küm September ita nungi tenzüka ken o angadanga aruba piyong obendangertemi

kulisürtem ken o mangadang. Parnokisa ISA [Internal Security Agency] züngsem ka dang danga asüngdangya masü," ta Amnesty International-i metetdaksü.

April 15 nü Tripoli nung aliba court kati Libya nunger 9, Libya tsür ka aser Pakistan nung ka küm asem nungi küm 15 tashi tepuokdak ayutsü obendang agüja liasü. Parnoki internet ajanga Islam yimsü mezüngmeshiogo ta aija liasü.

Khristantemji 2023 küm March ita nung Tripoli nung amenoka aliba ISA-i pua liasü. Khristantem jagi Libya nung Muslim nungertem Khristan yimsü dangi meyipdaksütsü meranger, ta tai tonglokja liasü.

ISA-i apubatem rongnung America nungera ana liasü, ajisüaka tenajibo anogo ana-asem tsüngda chiok, ta Amnesty-i metetdaksü.

Libya nunger Khristantemji reshikangshi aser lawyer tem medeni parnok dang asüngdangyaa liasü; aibelen nangzükdaksütsü atema Khristantemji rongshia liasü.

"2023 küm April 6 nungi April 13 tsüngda ISA-i parnok indang official YouTube channel nung pua alirtem rongnung nisung tenet indang video sayu. Iba video nungji Khristantem jagi 'parnoki Libya nung Khristan yimsü ajungkettsü aser tangartem Khristan yimsü dangi

meyipdaksü' ta nangzüka lir," ta Amnesty-i metetdaksü.

Mezüng ken o angadangba mapang nung Khristantem atema attorney memela aser parnoki aibelenogo ta parnok nem kangshia nangzükdaksü, ta Amnesty-i metetdaksü.

"Pakistan nunger Khristan kaji ozüng alema telok ka tentettsü aser linük temzüng melenshitsütsü nükjidong nung Libya-i aru, ta Public prosecutor-i tai tonglokja liasü. Ajisüaka Pakistan nungbaji 1992 küm arrshi küm 10 asü dang par kibong den külemi Libya-i aruba lir," ta Amnesty-i metetdaksü.

Public prosecutor-isa Libya nunger Khristan 10 ji Islam

yimsü mezüngmeshiba ken o nung aitsütsü telemtetba agi, ajisüaka parnoki Islam yimsü mezüngmeshiba kuli ISA-i magütsütet, ta Amnesty-i metetdaksü.

Amnesty International-i Libyan public prosecutor dang tangsa item ken o ajak tanaben angashitsü takhangba agütsü.

"Libya nung ketdangsertemi tangsa item ken o agientsü aser tepuokdak alirtem anema obendang agientsüla," ta parnoki takhangba agütsü.

Alima nung Khristantem atema linük tamajungtiba 50 rongnung Libya ya jenjang 4buba nung lir (Open Doors' 2025 World Watch List).

AO OSHI ANGAZÜKDAK:**TANÜ ANGAZÜKTSÜBA OJANG****Teshisatetba**

(adv) bilemdanga rajemba (thoughtful idea)

Teshisatetba tajung ajak Tsüngrem nungi arur.

Teshisatettsü

(adj) Teratettsü, apijemtetba (comprehend)

Teshisatettsü sempet alirtemi sentong tajung yanglur.



Tir Yimyim

OLONG PAITEP # 7242

1						2				3
								4		
5		6				7				
8										9
								10		
				11		12				
		13								
14						15				
				16						

TIPLÉN

1. O jembitsü tashi - 8
5. Süngjang tapu ka - 5
7. Tekanük nung enokba - 5
8. Teka amtep - 5
12. Tzüik asendak - 5
14. Tsüngpang tema aliba - 5
15. Ken atenba yimya - 5
16. Asangur - 8

LANGTSÜNGLEN

1. Tepok telung nung shilem ka - 7
2. Tamajung aküm - 5
3. Chi den külemi achiba - 3
4. Meimchir alimai aruba - 3
6. Laishiba nung ayong ka - 4
9. Tarutsü nükla - 7
10. Tamendakdak/Nükjidong - 4
11. Tenük-telen mejungi aküm - 5
13. Terok nungi adokba - 3
14. Meimchir telemsa - 3

OLONG PAITEP # 7241 TELANGZÜBA**TIPLÉN :**

1. Meyi, 6. Shin, 7. Yimkong,
9. Tera, 11. Teberem, 12. Anem,
15. Senmang, 17. Tenü, 18. Anep.

LANGTSÜNGLEN :

2. Yim, 3. Tanü, 4. Shilem, 5. Ano,
7. Yakta, 8. Kilem, 9. Tenem,
10. Amang, 11. Tenüng,
13. Mela, 14. Ita, 16. Ain.

**LANURTEM SENDEN KA :**

- Onir** : Nenok ajak tashitemeteterem dang anungji tanOnbo asen lima atema koma asünung tajungba süla ta lemsatepti nenok nungi shisatsü meshir.
- Lanur 1** : Sir, nia tepilemba ka shinür akümstübutepa litija.
- Onir** : Kanga junger, saka iba jagi asüküm dang tenzüksü.
- Lanur 2** : Tang inyaka alir ajak ya melenti arungkoto?
- Onir** : Ajia junger amai, saka meraksai yanglu tajungba sütisü na?
- Lanur 3** : Sir, oda nia tebilemba ka shinür, oda asenok lanur paika ya rongsen jenti endoka züngteter yamai dang melinür, Anungji mapa tasen kar asateta inyakti koda?
- Onir** : Ajia junger amai, sakaaa....
- Lanur 4** : Aree Sir! saka agi tempanger no? onok ya joko over age tatonger akoti. Hangkoto lenmang kar bushiti.
- Onir** : Hai, nenok ajak dang ni tamai shinür. Asenok ajak ken tejen kümtine?
- Lanur ajak** : Waaa Sir, ya na kechi tejen indang onok dang ashir ya? Onok tejen agi laktetogoya. Sala..
- Onir** : Masü, ajak tasen tajungba. Saka tajungtiba yanglutsüji tejen asem nüngdaker. Itemji yamai - (1) Driver (2) Doctor (3) Tesayur. Passangertem driver tejen-i aniba car nung dang mennür, shirangertema Doctor tejen dak dang tamangakar aser aneper, nenok shisashirtema tesayur tejen-i sayuba nung tamang akar aser takok angur. Yamaji nenoki bilemba amaji au asen lima kanga raksaogo, anungji asen lima yanglutsü atema nüburtema temolung lemtettsüsa, Driver, Doctor, Tesayur tejen dak rangloker asen lima mesoti.
- Lanurtem** : Waaaa Shisalen sayur Onir ajung ya shidak-a ni

Lilir : N. Saku Imsong, 4th Mile Diphupar.

Mechuka nung ISRO space laboratory ka lapokogo

Arunachal Pradesh Education Minister Pasang Dorjee Sona-i Hokolbarnü Shi-Yomi district kübok Mechuka nung space laboratory ka lapokpa sentong nung tangokba noksa angur.

Itanagar, Luroi/August 16

(Agencies): Arunachal Pradesh Education Minister Pasang Dorjee Sona-i Hokolbarnü Shi-Yomi district kübok Mechuka nung space laboratory ka lapoktsüogo.

Iba laboratory ya Mechuka Government Higher Secondary School nung amenoka lir, koba Indian Space Research Organisation (ISRO) aser Muskaan Foundation na longjemer yangluba lir.

Lab ya kaketshirtem nem space science aser technology dak sendakba nung tajangshiba agütsütsü nükjidong nung design süa yangluogo, aser iba ajanga tanurtem dak metetnüba tanüla adokdaksütsü aser purapiteta iyaktsü asoshi ajungmesotsü, ta

ketdangsürtemi ashi.

Pasang Wangchuk Sona ISRO Space Laboratory ya Minister Pasang tebu tenüng nung lapokogo, shibai shisaluyim dak temelenshi bener arutsütsü tashi aliba dak ajemdaker taküm tepeyong bendanga agüja inyaka liasü.

Sentong nung o jembiba mapang Minister Sona-i, pa kanga nema adangba lemsatepba den ashiba agi, "Pasang Wangchuk Sona ISRO Space Laboratory' lapoktsüba ya kü atema kanga dang tongtibang lir, kechiyong iba ajanga kübu tushir. Iba laboratory ajanga pai shisaluyim dak tamang akaba aser metetnüba aser angazüknüba tejangraba aliba temaitsü sayur. Iba tesem ya

tanurtem ajungmesoba tesem ka kümdakja parnoki temaba jenjang tongtetsü atema nükjidong ayutsü imlar."

Minister-i ashiba agi, iba facility ya nüburtem ajungmesoba aser purapitetba teyongsü asütsü ta shia, Shi-Yomi nungi kaketshirtem dang science aser technology nung temaba jenjang tongtetsü atema merangtsü ajungshi.

Iba Laboratory lapokba sentong nung Shi-Yomi Deputy Commissioner Liyi Bagra, Deputy Director of School Education Tade Dabi, Muskaan Foundation's Chief Operating Officer Pranesh Debnath, tesayur, kaketshir aser lokti tentet balala lenirtemi shilem agia liasü.

Manipur nung kaketshirtemi AFSPA anema longkak ait**Imphal, Luroi/August 16**

(Agencies): Pebam Chittaranjan sür küm 21 ajungba anogo nüngdem nung kaketshirtem timba sür nisung noklang aikati International Imphal Airport lenmang nung silent rally ka nung shilem agiogo. Chittaranjan ya kaketshir ka liasü, shibai Armed Forces (Special Powers) Act (AFSPA) of 1958 anema pasa mi senoker rongseta asü.

Iba rally ya Manipuri Students' Federation (MSF)-i ayongzüik aser Manipur nungi AFSPA meshimeshia agintsü takhangba agütsüogo.

Honibarnü Rally ya Imphal yimti teyong nung Keishampat tesem nungi tenzüik aser Imphal Airport anasa Imphal College nung tembanga liasü.

Rally nung shilem agirtemi naro agüja Pebam Chittaranjan Mangang nem tetushi agütsü, shibai 2004 küm August 15 nü state nung AFSPA maneni benokba anema pa taküm bendanga agüja liasü. Pa arishi küm 28 liasü.

Chittaranjan ya MSF advisor aser AFSPA aginsü ahangertem rognung ka liasü. Iba ozüng agintsü atema Manipur nung nüburtemi ola

adokba mapang ka nung pai iba jenjang agi. Pa temang kanga mejungi arongba sülen August 16 nü asü.

2005 küm nungi MSF-i iba inyakyim tushitsü atema kümshia sentong ayongzüka agia arudar.

MSF tir, Hijam Roshan-i anir iba sentong agi aser state nungi AFSPA khenyongi agintsü atema par lokti tentet takhangba nenshia metetdaksü.

AFSPA koba dang Black Laws ta ajar, iba ozüng ajanga armed forces tem nem tashi aika agütsür, kong tashiyim amshitsüba densema lir.

Manipur Angh-i UNC dang azüzüka inyaktsü mepeshi**Imphal, Luroi/August 16**

(Agencies): Manipur Angh Ajay Kumar Bhalla-i United Naga Council (UNC) dang Free Movement Regime (FMR) aginba aser Indo-Myanmar arrtsü nung atsü atsüba dak sendakba nung centre sorkar den sensaksemba mapang atasatsü aser yimjung meraksadaksütsü mepeshia metetdaksüogo.

Raj Bhavan nungi Honibarnü sangdong ka ajanga ashiba agi, UNC nungi lenirtemi Angh Bhalla den

Imphal nung ajurutepa FMR aser arrtsü nung atsü atsüba tebilemtsü lemsatepogo.

Lenirtemi Angh dang iba ken o ya India sorkari dangi abentsü mepeshia liasü. Angh-ia parnok tebilemba tem kanga junga angadangogo, aser ken o ya Ministry of Home Affairs nem metetdaksüogo ta ashi.

Paisa, yimjung nung maneni sensak asemstü ayongzüka den UNC züngsemtem dang sensaksemba mapang azüzüka inyaksangshitsü mepeshia liasü.

UNC-i state aser Centre naprongla nem anogo 20 atema tezüluba nung takhangba ka agütsüba tembangba sülen iba senden ya mena liasü. UNC-isa, August ita tatemlen longkak aitba sentong balala ayongzüka agitsü amokmerena liasü.

UNC-i ashiba agi, parnoki tezüluba nung takhangba aika agütsüogo, lokti senden ayongzüka agiogo aser democratically osang balala lemsatepogo, ajisüaka sorkari temulung süa telangzüba magütsü.

Ceasefire telemtetba makai Alaska nungi Trump aser Putin senshiogo



Alaska nung Russia Tir Vladimir Putin & US Tir Donald Trump na senden amenba mapang tangokba noksa angur.

Anchorage, Luroi/August 16 (Agencies):

Rara aliba linük ana tsüngta ceasefire alitsü atema yimjung tezüngzüktep ka ali junger ta Russia aser Ukraine tir onoki angatetogo, ta US Tir Donald Trump-i ashi.

Alaska nung Russia Tir Vladimir Putin den senden amenba nung tezüngzüktep kecha makai tembangba sülen US tiri pa indang Truth Social nung aiben ceasefire ya mela-mela marur ta ashi.

Aji masüandang Trump-i alima dang senden nung terenlok tajung liasü ta ashi saka tezüngzüktep tsütsü 'onoki aji metongtet' ta shia liasü.

Pa Washington-i meyipa aoba sülen pai Ukraine Tir Volodymyr Zelenskyy den phone ajanga jembi, shibai mapang tatsüka lir Hombarnü Washington DC-i aotsü ta ashi.

Washington-i meyipa shilangba sülen, Alaska nung anogo tajung aser takokmanung liasü, ta Trump-i ashi.

Pai Putin den senden junga menogo ta ashi aser Zelenskyy, European lenirtem aser NATO Secretary-General Mark Rutte nung den phone ajanga jembi.

"Russia aser Ukraine tsüngta tetsübotsü rara tembangtsü asoshi lenmang tajungtibaji indang-indanga Peace Agreement yangluba ya lir ta ajaki angateta lir, aser Ceasefire Agreement kisung masü, koba aiben mataloker," ta pai zülü.

"Hombarnü Zelenskyy den jembishinü junga katetra, Tir Putin den senden ka ayongteptsü," ta Trump-i ashi.

Kanga junga ketdang süa senden amenba nung telemtetba

tajung kecha magitetba sülen iba osang ya pai lemsatep.

Anchorage nung aliba Joint Base Elmendorf-Richardson-i lenirtem adenshiba ya kanga junga anepalua liasü.

Ukraine nung war crimes inyak ta tai tonglokja International Criminal Court ajanga arrest warrant agüja alisang Putin ya pa indang tayimtsü nungi ayazüka aludang red carpet lemja liasü aser Trump-i pelashishia agizük.

Anünglen B2 bomber ka yima ao aser tena noksa tangoker Trump indang presidential vehicle (The Beast) nung amen.

Yimjak nung yamaji sayuaka aser Kremlin-ia senden ya ghonta trok mesüra tenet amentsü akok ta takzüa liaka Trump asr Putin na senden ya ghonda asem majung amen aser osangbener nem külemi sangdong agütsütsü aru.

Teti asoshi tangatettep kati arutsü atema asenoki Ukraine nung rara tenzükba tera samatsütsüla, ta Putin-i ashi.

Putin-i yamaji ashiba ajanga Russia-i shilem kar amokbanga aliba region pezü - Donetsk, Luhansk, Kherson aser Zaporizhzhia - nungi Ukraine ainshitsüla aser NATO nung adentsü merangba anentsüla ta pai mapang talangka nungi khanga aruba meyutsü ta sayur.

Zelenskyy-i region pezü nungi mainshitsü ta ashir aser yamaji inyakra tarutsü nung Russia-i ano temulung ulushir amaktsü atema kishi lapoka yutsütsü ta ashir. Moscow-i 2014 nung Crimean peninsula rakzükba sülen küm asem tejakdang tashi ajak amshia

Ukraine amak tenzük.

Putin-isa Ukraine aser European nung dang yimjung maparen nung tetsükdaktsü magütsütsü ajungshia liasü. Putin-i minute ti shi osangbener den jembidang Trump ola madoki ataa liasü.

Iba sülen US tiri Tir Putin den tesendaktep tajung lir ta ashi.

"Onük aika nung mulungtepogo, saka ishika anünga lir, aser ka kanga tongtipang lir," ta pai ashi saka koba onükar mashi. Aser tasüngdangba melangzü.

Jembishinüba sülen bilateral "working lunch" sentong nunga tena maden.

Senden amenba sülen Fox News den sensaksemba mapang, senden kanga junga menogo aser result tajung angutsü akok, ta Trump-i ashi.

Alaska sendeni aodang, Russia tiri rara anentsü memulunga timtem tulu alitsü ta amokmerena liasü. July ita nunga pai anogo 50 tsüngta Ukraine den yimjung tezüngzüktep ka meyanglura Russia indang tanünga trade partners dang secondary tariffs 100 shilem meshitsü ta shia liasü.

Fox News ajanga item amokmerenba indang koma asür ta asüngdang dang, "Asenoki tanübo iba indangji mebilemstüla. Hopta ana-asem nung bilemstü akok, saka senden junga menogo," ta Trump-i langzü.

Zelenskyy densema par asem senden amentsü akok asü ta asüngdang dang, "Tenaprongi yangji ni lidaktsüner aser ni yangji alitsü," ta pai ashi saka senden amentsü atema anogo mesüra tesem indangbo melemsatep.

Washington DC-i meyipa aoba mapang Trump aser Zelenskyy tsüngta phone nung mapang talangka jembi aser iba sülen sensaksem nung UK Ato Kilonser Sir Keir Starmer densema NATO lenirtema aden.

Zelenskyy-i Trump ajurutsü asoshi Hombarnü Washington-i aotsü ta ashi aser Trump-i par asem senden amentsü asüngdangba paia mulunger ta shia liasü.

Pakistan tzümetzüng lendong nung nisung 300 dak tema süogo

Islamabad, Luroi/August 16 (Agencies):

Pakistan nung meyi tzünglu ajanga ajungben tzümetzüng, alinen aser ajungbena tzünglu kanga sashia aruba ajanga linük northwest tsütsü anogo ana nung nisung 300 dak tema takum samaogo, ta osang ajanga ashir.

Timtem nung alirtem kimzükba maparen tang teinyakdak lir aser teyari agütsütsü asoshi emergency funds salaogo aser August 21 tashi anasa aliba linük nung tzünglu kanga sashia arutsü imlar.

Taküm tzüngluruwa nung tzünglu tesashitüba aruba ajanga Khyber Pakhtunkhwa province tesem ajungalen teraksa bener arutsü, kong ajungbena tzünglu

kanga sashia aruba, alinen aluba, tzüangi aiba aser ki o jen laoba nungi asüba timba lir.

Tang tashinung nisung 307 asüba jangjaogo aser ano aika samar bushitar, ta Provincial Disaster Management Authority (PDMA) ajanga ashi.

Islamabad north tsütsü ghonda asem ser tesadang pilar Buner district nung tesashitüba kongshi, kong nisung 184 asü. Ajungben tzümetzüng aser süngdong-lidong laoba ajanga nisung, ki aser kiset shiruru ponger ao. Iba district nung tang tashinung nisung 93 tasü mang ngutetogo aser tetsür aser tanur aika pei aliba tesem nungi mainshiteti lir.

Shangla nunga nisung 34 asü aser parnok ya timba tzünglu

kanga sashia aruba ajanga ki ka indang kilem tsükba nung asü, ta provincial Chief Secretary Shahab Ali Shah-i ashi.


Medical camps tem amenokogo aser timtem ajurua alir nem chi-aon agütsür. Nokdanga aliba lenmangtem lapoktsü asoshi machinery tulutem yoka lir.

Rescue and relief operations nung civilian aser military team tem inyaktar, ta Deputy Prime Minister & Foreign Minister Ishaq Dar-i ashi. Tensa asadangtsü asoshi Ato Kilonser Shenbaz Sharif-i ajungben senden ka ayongzüka menogo.

Maneni tziügsang majungba yong Hokulbarnü rescue helicopter ka tsükoka yangji mena aliba ketdangsür ajunga asü.

MULONGNEN O

'Shiri taremsük nung , tajung inyakba nung, sentsüwangshi tetushi aser tamasaba bushir, parnok nem teti taküm pai agütsütsü' Rom 2-7



Asüba- 05.08.2025

Mapang ajak nung onoki meima aliba tsürabur asür **Imkongnukshi** (Chuchuyimlang) mapang tatsuka shirangba anogo nungi pa akümüli wadang tempangba anogo (05.08.2025) tashi ozü den shisatsü aser sarasadem, nübo aser rongsen agi yaritepogo nenok kija aser kibong, lokti aser arogo, kiyonger aser yimtsür yimer ajak dang kangasa pelar-ani ta shisemer. Asen tulusang Tsüngremi teti nenok mapa tajung asoshi moajungma ta ozü sarasadem.

~ Temeim kinungtsu, chirunur aser kinungertem

MOLUNGNEN O



Aso-02/02/65

Asü-10/08/25

Onoki teti meima aliba asür **T. Lano Lkr** (Longjang) pa shirang yipden nung aliba mapang nungi akümüli wadang tempanga aruba anogo tashi kija, kibong aser lokti shirnokisa nübu, rongsen shisatsü aser sarasadem agi yaritepogo, nenok ajak dang tebang agi meshitetba tepela iba sangdong ajanga lemsateper. Nenok mapa tajung asoshi Tsüngremi maneni moajungma.

~ Temeim Kinungtsü, Kinungertem

KHONANG TETUSHI AGÜTSÜR

Oboula Tsüpongtsüngba Longkumer Semchirtem rongnungi **Ms. Tamsulila Lkr** D/o Mr. Meyatoshi Lkr & Mrs. Jongpongrenla Pongen, lai 2025 Miss. Mokokchung Beauty Pageant toktepbba nung 1st runners up jenjang ngutet, aser Miss Kilangtola Pongen D/o Mr. Nungsangtemjen Pongen & Mrs. T. Akangkoka Lkr, lai 10th rank, Department of English, Fazl Ali College Mokokchung, under Nagaland University (UG CBCS), nung takok ngutet.

Nenok takok tulu ajanga semchirtem nem tenüng tajung bener arutsü nung asen tebou semchirtem nema tangteter aser khonang tetushi agüja tepela sangdonger. Maneni tarutsü mapang ajak nung nenok nungi takok tajung imla-a atar.

Tsüpongtsüngba Longkumer Semchir Telongjem Longjang



Office of the
AO RIJU
MOKOKCHUNG : NAGALAND - 798601
"Kenozülü Yinsem"

REL.NO. AR/SU/2024/19

Date: 10-08-2025

AO RIJU SANGDONG

Ao Riju-i achaayanga Ao Oshi zülumen tetoktepbba (Spell Bee) sentong ka, Class 5-8 aser Class 9-12 nung azüngertem atema Mongputeni (October) 18, 2025 tashi nung akatsü. Tetoktepbba anaprong nung School shia nungi nisung anana jaoktsü. Anogo, mapang aser tesem tejangja jilia metetdaktsütsü.

Zülumen tetoktepbaji Arok Osep – 2019 nungi agitsü. Class balala atema telemsa yamai alitsü:

- * Class 5-8 nung azüngertem zülüjang A – L tashi nungi asüngdangtsü.
- * Class 9-12 nung azüngertem zülüjang M – T tashi nungi asüngdangtsü.

College azüngertem atema Rajem zülü (Essay writing) tetoktepbba alitsü. Rajem zülutsü atema mezüng tenüng agütsür nungi tenzüka nisung semer dang agizüktsü. Rajem zülü onük mapang nung agütsütsü. Saka item ama lushi nungi onükji agütsütsü: Ao Kin Sobaliba ajanga oshioben terenlok (Kiyimluyim, Kisüjensü, Yartsüngsang, Kentenmenü, Amungtsümung, Olangla aser Takyatako amala).

Tetoktepbba asemprongla nung mezüngbuba aser tanabuba nem senpet yamai agütsütsü:

- * Mezüngbuba - Rs. 5,000/-
- * Tanabuba - Rs. 3,000/-

Tetokteper ajak nem Mulungsüsem Kulikaket agütsütsü.

Sd/-

(S. Wati Ozüküm)

Tongti Zülur, Ao Riju

2026 Dr. T. Ao trophy Mokokchung nung ayongtsü asoshi wako agizükba den temoatsü meshiba sentong ka agi



Dr. T. Ao Trophy 2026 atema NFA wako agizüka temoatsü meshia sarasadem sentong agiba mapang tangokba moksa angur.

Mokokchung, 16th Aug (TYO):

Mokokchung District Football Association (MDFA)-i sangküm 2026 nungji Nagaland Football Association aküm nung 25 buba Dr. T. Ao Trophy ayongtsü agizüka lir. Iba nungtem nung NFA wako agizükba den iba asayamung takok ngua mungtettsüsa asoshi temoatsü meshiba sentong ka 16th Aug nü yangi MDFA office nung ayongzüka liogo. Alempang Baptist Arogo Pastor, Rev. Ngangnen Longkumer-i wako aser 25 buba Dr. T. Ao trophy

2026 asoshi temoatsü meshija sarasademsü.

Iba sentong nung taoba MDFA tongti zülur, Imkongsunep-i tajungshi o jembidang, nungtugu footballer Dr. T Ao ya iba district nungi sotetba nübu ka lir, anungji, 25 buba jubilee asayamungji yangi Mokokchung nung ayongbaji kanga tapet adoker. Aji oda, iba asayamung takok ngua ayongtsü asoshi Astro turf football ground merenemi aliba den ano tanga kechisa teinyaktsü ali, itemji asenok ajak

yaritepa lungjemer nungdabatem inyaktsü asoshi tayongzüka ka agütsü.

Mapang ka Mokokchung district ya football asayar tajung adokba yimti ka liasü, saka tanübo asenoki tangar memeneper, ibaji asenok dak sempet maliba agi masü saka asenoki temulung magütsüba ajanga lir. Saka taküm Dr. T Ao trophy nung semi-final tongtetba ya tepelatsü aser iba jagi asenok football luyim tsütsü terabo renlokba kuli sayur, ta pai ashi. Anungji, taoba mapang asen district football asaya nung wangshiba amato tanaben shilua arutsü nükla yur meranga asayatsü asoshi paisasa ayongzüka jembi.

Asayar ajak anepalutsüba ya kanga tasak, yangi senotsü aika sentaka lir. Anungji, sangküm 25 buba asayamung atema ya asayar shia teyarir kaka shimteter yaritep nungbo teyarir atema-a khuret tulubo masütsü, anungji, iba inyakyim tasenji benshidangtsü asoshi paisa tebilemba ka lemsatop.

Kasa sentong nung tawa tembangba 24 buba Dr. T. Ao trophy 2025 nung Mokokchung district nungi Best Mid-Fielder Award angusang Sentilong tushia liasü.

Australia-i South Africaden T20 asayamung 2-1 agi kokogo

Luroi/August 16, 2025 (Agencies): Australia aser South Africa na Honibarnü Cairns nung tatembangbuba T20I asaya nung Glenn Maxwell-i ball 36 nung run 62 yanglua par team takok dangi anio. Iba asaya akokba sülen Australia-i iba T20I asayamung ya 2-1 agi kokogo.

Asaya akoktsü atema run 173 arishiba mapang asaya ya tatembangbuba over tashi asaya liasü. Ball ana nung run pezü nungdaka aliba mapang Maxwell-i boundary ka züka iba asaya koka liasü.

Run arishiba mapang captain Mitchell Marsh aser Travis Head nati over tibuba tashi nung run 66 yanglua liasü. Marsh-i four asem aser six pongu züka ball 37 nung run 54 yanglua liasü.

Ajisüaka asaya tom atongba mapang South Africa team-i ball 13 tsüngda wicket asem agia parnok jenjang jung aküm, saka Maxwell aitba sülen

parnoki pa mazüokteti asaya kokdaksü.

Iba asaya atema Maxwell nem Player of the Match naroküm agüja liasü. "Corbin-i ball kanga junga onogo. Asaya akokba atema pelar. Ni süngjemshir ball kanga junga repranga asaya aser boundary kong angutsü aji angateta liasü. Iba T20 team yagi kanga junga asayaogo. Iba ajanga onok sasa dak tali temulung lemteta kümdaktsütsü," ta Maxwell-i ashi.

Iba asayamung nung Tim David nem Player of the Series naroküm agütsü. "Maxi-i junga masaya asübo ni indaki menokdaki lila. Ni jangradema toktepa asayardar. Tali tapong asayatsü memerangi tongmelang agi asayadar. Form bo oli aruli asür," ta pai ashi.

Australia-i tawa T20I kanga junga asaya arudar. Parnoki Scotland, Pakistan, West Indies, aser South Africa kokogo aser England dena draw süa liasü.

Alvaro Morata Serie A club Como nung denogo



Luroi/August 16, 2025

(Agencies): Spain nunger striker Alvaro Morata, AC Milan nungi loan nung oa Serie A club Como nung denogo. Tenangzüktepba yangluba nung pa teti atema alizüktsü asoshi lenmang sadema lapoka yuogo.

Arishi küm 32 tain asayar shiba San Siro nung asayatsü asoshi maongka mongui kümogo, pa taoba ita ishika Turkey club Galatasaray-i loan nung oa asaya liasü.

"Como 1907-i, Álvaro Morata loan nung aruba aser pa alizüktsü atema lenmang lapoka ayuba metetdaksür. Pa ya alima nung team tajungtibatemi arangtetshitsüba asayar ka lir. Pa taoba mapang Real Madrid, Juventus, Chelsea, Atlético Madrid nungi asayaogo aser Spain national team nungia asaya arudar," ta club sangdong ka ajanga metetdaksü.

"Ni Como nung adenba atema kanga pelar. Taoba küm parnok den asayaba mapang ni par team aser parnok project tenüing sanga liasü; club nükjidong tulu aliba angur," ta Morata-i ashi.

"Ni training session aser asaya ajak nung 200% agüja asayatsü fan tem aser club nem tenangzüka agütsür. Ni iba tola asemtsü matateter," ta pai shisem.

Como head coach Cesc Fabregas, shiba lenisüba nung par team taoba küm Seria A nung 10buba nung tembanga liasü pai, "ni Álvaro ya küm aika meteta lir aser ni pa asayaba yimya nükhia aruogo," ta ashi.

"Pa tesangra striker ka lir, shibai tongtibang mapang shilem tajung agiogo aser pa ya pa meketa alirtem ajak ajungmesoba teammate ka lir. Pa Como-i aruba atema onok kanga pelar," ta paisa shisem.

Morata Real Madrid, Juventus, Atletico Madrid aser Chelsea nungi asayaba mapang pa indang career nung takok marok aika kokogo. Pa lenisüba nung Spain team-i 2024 küm Euro koka liasü.

Serie A season tasenba truba hopta tenzüksü aser Como pur mezügbuba asaya kidang Lazio den August 24 nü asayatsü.

Cincinnati Open: Alcaraz aser Zverev na semifina-i iogo



Luroi/August 16, 2025

(Agencies): Cincinnati Open nung Honibarnü defending champion Carlos Alcaraz-i kanga toktepa asayar Andrey Rublev koka smifinals-i iogo.

Spain nunger asayar Alcaraz-i iba asaya nung Rublev ya 6-3, 4-6, 7-5 agi akok aser pa semifinal nung Alexander Zverev den asayatsü, shibai Ben Shelton 6-2, 6-2 agi kokogo.

Zverev aser Shelton na tanabuba set asayaba mapang 4-1 agi Zverev timba alidang court melentepba mapang Shelton-i kanga jashia pa indang racquet mereptoka liasü. 2021 küm iba asayamung koker alisang yagi iba asaya match point tanabuba anguba sülen akok aser pa anisüngzüksü atema ghonda 24 angutsü.

"Ni belematokogo, saka

anogo ka anisüngzüksü maongka nguogo. Ni noklang nung noklang renemer alitsü imlar. Kechi asüar mejangja, ni mezüngbo kanga junga liasü saka mezüngbuba set tatemi temang mejungi aküm. Ajisüaka ni taruba asaya atema takokba tashi jenjang agitsü," ta Zverev-i ashi.

Alcaraz aser Rublev na asayaba mapang tatembangbuba set nung 5-4 alidang asaya akoktsü atema Alcaraz-i serve asü saka Rublev nem pa indang serve ya break südaktsü. Ajisüaka teti ama Alcaraz-i temulungtetba tulu nung asaya aser game asembuba nung asaya koka liasü. Match point nung aliba mapang Rublev-i double-fault tibuba mena liasü aser iba ajanga asaya Alcaraz nem

kokdaksü.

"Tanabuba set mekokaka ni akoktsü ta tebilemba nung asayaogo," ta Alcaraz-i ashi.

Alcaraz-i taküm asayamung pongubo koker lir, kong French Open aser Monte Carlo o Rome na nung Masters 1000 asayamung akokba densema lir.

Tetsür kija asaya nung World number 1 Aryna Sabalenka aser second-ranked Coco Gauff na Elena Rybakina aser Jasmine Paolini nati tsükdaktsüogo.

Top seed aser defending champion Sabalenka ya 2022 Wimbledon champion Elena Rybakina-i 6-1, 6-4 agi akok. Kasa mapang nung America tsür Gauff-i 2-6, 6-4, 6-3 agi Italy tsür Paolini makokba asaya nung double faults 16 mena liasü.

BILEMDANGANG

"Tembar tajung kati nü tashi mait dak merangloker."